

# Publicaziun grischuna bain gartegiada

Chalender 2020 stampà a Poschiavo

DA GUIJU SOBIELA-CAANITZ

■ **Ad in docent pensiunà fa quai adina plaschair da ludar ina prestaziun d'in uman che frequentava antruras ina scola tar el. Quel plaschair prova ussa l'autur da questas lingias.**

La prestaziun da ses scolar d'antruras ha num «Almanacco del Grigioni Italiano 2020», gist stampà da Menghini a Poschiavo; l'editura è la Pro Grigioni Italiano (Pgi) a Cuira. Schefredactor è il publicist puschlavin Remo Tosio; lez enturn 1963 u 1964 frequentava mias classas en ina scola mercantila oz svanida. Il tom nov dal chalender cumpiglia 301 paginas da text e trais cun artitgels fitg variads ed interessants e cun bleras bellas fotografias da color. Il vegl magister gratulescha da cor.

## La Svizra e l'Europa

Tosio fa endament en l'editorial: «Lezza giada hai propost a la suprastanza [da la Pgi] da trametter il chalender a mintga chasada da las valladas italofoņas; suenter vivas discussiuns han ins acceptà. Oz nu vegnissi gnanc en dumonda da turnar tar l'usit d'incumbensar uffants da vender il chalender da porta a porta» (p. 12). Remo Lardi (Minusio/TI) rapporta davart la dieta da Coscienza Svizzer a ils 13 d'october 2018 tar l'«Università della Svizzera Italiana» davart las tractativas cun l'Uniun europeica (UE). Il politolog René Schwok (Università da Genevra) manegiava: «Alternativas realistas a la via bilaterala na datti betg» (p. 32). «Gret Haller, anteriura presidenta dal cussegl nazional, (...) punctuava che l'UE na possa metter en dumonda las quatter li-

bertads fundamentalas da ses project (circulaziun libra da la rauba, dals umans e dals chapitals, prestaziun libra da servizis). Cuss. fed. Ignazio Cassis, schef dal Departament federal d'affars exteriurs, ha lura serrà la dieta constatond ch'ils rapports cun l'UE sajan cumplitgads e tuttina fascinants. Ins na possa betg snegar che nus vivian en il center dal continent europeic e che nus sajan insaco perfin ses cor; ma l'istorgia da la Svizra dat cleramain perditga d'ina refusa essenziala d'augmentar la pussanza centrala (...). Noss pajais è da l'autra vart il terz partenari economic da l'UE; en ils davos quaranta onns ha l'firmà cun lezza tschienteventg cunvegns. La regenza federala vul la meglra integraziun economica pussaivla cun l'Europa ed a medem temp la meglra independenza pussaivla. I basegna ina cunvegna da basa per stabilir la segirezza giuridica e garantir a nossas interpresas in access reglè e tschert a la fiera europeica. Co pudess ins persvader la populaziun, cunzunt en la Svizra italofoņa, d'acceptar eventualmain in rinforz da noss lioms cun l'UE?» (p. 33). Co va quai vivant?

## La Moesa tranter Cuira e Blinzuna

L'anteriu district grischun Moesa ha num «Regiun Moesa» dapi Bumaun 2016 (passa 8000 olmas). El cumpiglia dudesch vischnancas: Buseno, Calanca, Cama, Castaneda, Grono, Lostallo, Mesocco, Rossa, Roveredo, Santa Maria en Calanca, San Vittore e Soazza. Il punct culminant è il Piz Tambo (3279 m) tranter ils intschess da Mesocco e da San Gia-

como Filippo (provinza da Sunder en Lombardia). L'autostrada A13/E43 traversa l'entira regiun, da San Vittore al tunnel da S. Bernardin, cun sis sortidas: Roveredo, Lostallo, Mesocco sid, Mesocco nord, Pian San Giacomo e S. Bernardin. Lino Succetti (Lostallo) ha scrit ina contribuziun intitulada «Moesano, quo vadis» en l'Almanacco 2020 da la Pgi» (pp. 164–171). El rapporta da lezza regiun: «Igl è grev da survegnir respostas per talian cur ch'ins sa drizza a l'administraziun chantunala, savens perfin a la polizia, sco ch'igl è gia daventà cun il numer 117 tar problems da lingua cun giasvischs d'agir urgentmain. Quai mussa che tscherta glieud na s'empatscha insumma betg da la cuminanza italofoņa (...). Insaquantas interpresas da la Regiun Moesa fan commerzi surtut cun il chantun Tessin; blers umans domiciliads en la regiun lavuran en il Tessin. Quai vala era per tgi che studegia u fa in emprendissadi (...). En la Regiun Moesa è l'appartegnientscha al Grischun bain enragischada (...). Cunzunt en la part sut e me-sauna crescha l'immigaziun residenziala dal Tessin, grazia a las colliaziuns stradalas e perfin ferroviaras cun Castione/TI e cunzunt Blinzuna dapi l'avertura da l'AlpTransit (...). L'avertura dal tunnel da via dal Bernardin 1967 ha pussibilità da cuntanscher tgunsch la chapitala chantunala (...). Ma l'augment dal traffic sin lezza via patescha d'in trassé inadattà per il traffic grev» (pp. 164–165). Ils paucs exempels preschentads mussan ch'i vala la paina da sfegliar l'Almanacco 2020 da la Pgi: Quai dat lura quaida da leger l'entir volum.